



Inatsisartuni ilaasortaq  
Karl Tobiassen, Siumut  
/Maani

**§ 37 naapertorlugu Karrat 3-mi qaqqamit sisoortoqarsinnaanera pillugu Naalakkersuisut aamma Avannaata Kommuniata akornanni suleqatigiinnermut tunngatillugu apeqquteqaammut nr. 045-2021-mut akissut**

Asasara Karl Tobiassen

Brevdato: 31-05-2021  
Sagsnr.: 2021 - 1782  
Akt-id: 16863001

Postboks 1614  
3900 Nuuk  
Tlf.: (+299) 34 50 00  
Fax: (+299) 34 54 10  
E-mail: pan@nanoq.gl  
www.naalakkersuisut.gl

Inatsisartut suleriaasianni § 37 naapertorlugu Karrat 3-mi qaqqamit sisoortoqarsinnaanera pillugu Naalakkersuisut aamma Avannaata Kommuniata akornanni suleqatigiinnermut tunngatillugu Naalakkersuisunut apeqquteqaateqarputit. Apeqquteqaatitit uannit akisassanngorlugit innersuunneqarput.

**1. Naalakkersuisut Karrat 3-mut tunngatillungu paasissutissiinerup kingorna iliusissat suut Avannaata Kommunea peqatigalugu pilersaarutigaa?**

**Akissut:**

Naalakkersuisut Avannaata Kommunia suleqatigalugu innuttaasunut, Karrat 3-mi qaqqamiit sisoortoqaraluarpat eqqugaasinnaasunut, aammalu sumiiffimmiit nuunnissaminnik kissaateqartunut ajornartoornermi inissiivissanik, tamatumalu tulliatut inissianik attartortittakkanik qulakkeeriniarput. Aammattaaq apeqquteqaammut 3-mut akissut takuuk.

Tamatuma saniatigut Naalakkersuisut sapinngisamik kommuni sullissisullu allat suleqatigalugit, nalunaarusiamit ”Upalungaarsimanermik ilisimasallit Karrat Kangerluat pillugu ulorianartorsiorfiusunik naliliinerat”-ni, Karrat qaqqaanik alapernaarsuinnermut, ajornartoornermi attaveqaqatigiinnissamut pilersaarummut, kalerrisaarutininik atuutsitsilernissamut, attaveqaatit pisariaqartut misissornerinut il.il. tunngasumi upalungaarsimanermik suliallit inassuteqaataat malinniarpaat. Nalunaarusiaq tamanit pissarsiarineqarsinnaavoq, aammalu Naalakkersuisut nittartagaanni pissarsiarineqarsinnaalluni.

## **2. Qaqqap nakkaateratarsinnaanera pissutigalugu nuutitsisoqassappat Naalakkersuisut Avannaatalu Kommunealu sutigut nuuttussanut ikiorsiissuteqarniarpat?**

### **Akissut:**

Kommuni annaassiniarnissamut upalungaarsimasunik pilersitsinissamut akisussaasuvoq. Aamma kommuni upalungaarsimanermut pilersaarummik suliaqarnissamik qulakkeerinissamut akisussaasuvoq.

Avannaata Kommunia suleqatigalugu qimarnussinissamut immikkoortunilu tamani tamanna pillugu ilisimasat aallaavilerneqarnissaannut pilersaarutininik suliaqartoqarpoq, taakkununggalu ilanngullugu sumiiffinni eqqugaasussani innuttaasut suleqatigalugit qarsutsiviusussat portussusii qummut qaangerlugit katersuuffissanut qimaanermi aqqutissat piviusorsortut pisinnaasullu, kiisalu sungiusartoqartarnissaa suliarineqarlutik.

Tamatuma saniatigut Naalakkersuisut Avannaata Kommunia suleqatigalugu attaveqaatit pisariaqartut misissorneqarnissaat qulakkeerniarpaat, tassungalu piffissaq qanittoq ungasissorlu eqqarsaatigalugit taakkunani iluarsisassat iluarsineqarnissaat qulakkeerniarlugu maanna attaveqaataasut sanngheetutiginnaasaat aalajangersarniarlugit.

Tamatuma saniatigut apeqqut 1-imut aamma 3-mut akissutit takukkit.

## **3. Nuutitsisoqassappat Naalakkersuisut Avannaata Kommunealu inissanik neqerooruteqarniarpat?**

### **Akissut:**

Innuttaasut qarsutsiviusinnaasunut killeqarfiit iluanni najugaannaqarusunngippata, innuttaasut ajornartoornermi inissiivissamut neqeroorfigineqassapput. Ajornartoornermi inissiivissat kommunip upalungaarsimaneranut ilaatinneqarput. Ajornartoornermi inissiinissaq siunissaq qaninneq eqqarsaatigalugu ajornanngippat najukkani qarsutsivissanut killissarititaasut qummut qaangerlugit illuni pissaaq imaluunniit nunaqarfinni illoqarfinnilu allani pissalluni.

Tamatuma kingorna inoqutigiit sumiiffimmi najugarilivigassatut kissaateqarfigisaanni inissiamut attartortittakkamut utaqqisut allattorsimaffiannut allanneqassapput. Inoqutigiit kissaataat malillugu najugarilivigassamut innersuussisoqarnissaata tungaanut, sumiiffimmi inissiamik inoqanngiffiusumi attartorallarnissamik innersuussisoqassaaq. Tamanna nunaqarfimmi illoqarfimmiluunniit allami pisinnaavoq.

## **4. Nuuttoqassappat ilumoorpa Paamiut, Maniitsoq Aasiaallu kisimik nuuffigineqarsinnaasutut innersuunneqassasut?**

### **Akissut:**

Naagga, tamanna ilumuunngilaq. Innuttaasut qarsutsiviusussap killeqarfiata iluani najugaqartut namminneerlutik kissaatertik malillugu sumiiffimmut allamut

nuunnissamut periarfissaqarpoq. Aaqqissuussineq atussanerlugu nammineq aalajangigassaavoq.

**5. Naalakkersuisut KARRAT 3 pillugu GEUS Danskillu Naalakkersuisui nakkutilliineq, nalunaarasuaataasinnaasullu pillugit suut pilersaarutigaa?**

**Akissut:**

Naalakkersuisut ajornartoormik aqutsinissamut aaqqissuussinerup aamma upalungaarsimanermi piareersimanerup nukittorsarneqarnissaat pillugu isumaqatigiissusiortoqarnissaa qulakkiissavaat, tassungalu ilanngullugu pinsinnaasatigut piginnaasatigullu ikiorserneqarnissaq eqqarsaatigalugu Naalagaaffeqatigiinnerup iluani aamma/imaluunniit nunani saniliusuni upalungaarsimasunut assingusunut ikiorserneqarnissamut isumaqatigiissutinik nalinginnaanngorsakkanik isumaqatigiissusiortoqarnissaa qulakkiissallugu.

Tamatuma saniatigut Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmi sulisoqarpoq, taamaallaat kalerrisaarusiisinaanermut periarfissanik misissuinermik suliaqartumik. Suliaq taanna aamma suli GEUS-ip ataani ingerlanneqarpoq, kisiannili atorfinitsitsinermi suliaq sukkanerusumik ingerlalersinniarneqarpoq.

**6. Nunaqarfinni pineqartuni pisortat suliffeqarfiit ingerlataat qanoq iliussissanik pilersaaruteqarpat?**

**Akissut:**

Suliffeqarfiit pisortanit pigineqartut upalungaarsimanermut pilersaarutinik suliaqarnissamut akisussaaffeqarput.

Inussiarnersumik inuulluaqqusillunga

  
Kalistat Lund